



Inatsisartunut ilaasortaq  
Akitsinnguaq Olsen (S)  
/MAANI

### **Allaffissornikkut sipaarniarnerit pillugit § 37 malillugu apeqquteqaammut akissut**

29-01-2013  
Suliap normua 2013-079384  
All. nr. 1107824

Asasara Akitsinnguaq Olsen,

P. O. Box 1037

3900 Nuuk

Oqarasuaat (+299) 34 50 00

Nassitsigasuaat (+299) 34 63

50

E-mail: oed@nanoq.gl

www.nanoq.gl

### **Apeqqutigisannut matumuuna akissuteqarfigineqartunut qujanaq.**

1. Takussutissat kisitsisit angusarisallu maannamut qinigaaffik manna (2009-2013) qanoq Naalakkersuisunit takussutissaqarfiua?
2. Naalakkersuisut qanoq sutigullu allatigut allaffissornikkut sipaaruteqarfiusut saniatigut, assersuutigiinnarlugu utoqqarnut paaqqutarinninnissamut isumaginninnissamullu, aningaasaliissutissanik nassaartornissamut iliuusissanik suliaqarpat?

### **AKISSUTIT:**

1. 2010, 2011 aamma 2012-imut Aningaasanut inatsisissatut siunnersuutini 26,2 mio. kr., 15,6 mio. kr. aamma 4,7 mio. koruuninik allaffissornikkut sipaarutissat ilanngunneqartarput. Sipaarutigineqartut tamakku Aningaasanut inatsisissat inaarutaasumik akuersissutigineqarnerinut atatillugu piviusunngortinneqartarput.

Tamakku saniatigut kommuninut ataatsimoortumik tapiissutit 2010-mut Aningaasanut inatsimmi 30 mio. koruuninik aamma 2011-mut Aningaasanut inatsimmi 8 mio. koruuninik ikilisinneqarput.

2013-imut Aningaasanut inatsimmi pisortat suliassaqarfiini akit aningaasarsiallu naatsorsuusiorneqaraluartunit ikinnerusunngorlugit iluarsivigineqarput. Tamakku kinguneraat 19,5 mio. koruuninik sipaaruteqarneq.

Sipaarutigineqartut tamakku inerneraat Inatsisartut ukiut tamaasa qinigaaffimmi matumani aningaasanut inatsisissaq ingerlatsinermut sanaartornermullu oqimaaqatigiissoq akuersissutigisarmassuk, peqatigitillugu ilaatigut meeqqanut inuusuttunullu ajornartorsiutilinnut nukittunerusumik sullissinissaq suliffeqanngitsunullu immikkut ittumik sulissuteqarnissaq akissaqartinneqartarlutik.

2. Siunissami atugarissaarnissap aningaasalersorneqarnissaanut allaffissornikkut sipaarniarnerit taakkuinnaallutik pissutaanaviangillat. Tamakku pisortat suliassaqarfiini nutarterinerit ilagiinnarpaat Naalakkersuisut 2025-p tungaanut pilersaarutaannut "Siunissarput – illit uangalu akisussaaffipput"-mut ilaasoq. Tassani Naalakkersuisut kinguaariinnut tullernut atugarissaarnerup qulakkeerneqarnissaanut siunnersuutaat allaaserineqarpoq.

2025-p tungaanut pilersaarummi allaaserineqarpoq Naalakkersuisut inuiaqatigiinni sutigut tamatigut ataqatigiissumik sulissuteqarlutik siunissami atugarissaarnissaq qanoq isumannaarniarneraat. Pilersaarut qulequttanut immikkoortitigaavoq. Ilaatigut meeqqanut inuusuttunullu, ilinniartitaanermut suliffeqarnermullu tunngassutilinnut pimoorussaanagerusunik sulissuteqarnertigut qulakkeerneqassaaq siunissami amerlanerusut suliffeqalernissaat ikinnerusullu avataaniitsitaajunnaarnissaat. Tamakkunuuna atugarissaarneq aningaasalersorneqassaaq.

Taamatuttaaq suliffissuaqalernissamut nutaanik periarfissat atornerqarnerisigut ineriartorneq qulakkiissavarput minnerunngitsumillu suliffissanik nassataqarnissaa qulakkeerlugu. Ilinniartitaanerup sulissutigineqarnerinut maannakkullu suliffeqarnermik allangortiterinernut tamakku atapput. Kisianni tamakkunuuna atugarissaarneq aningaasalersorneqassaaq.

Tamakku saniatigut ukiuni tulliuttuni iluarsaaqqittoqartassaaq suliassanut allanut tunngavissisussanik. Akileraartarnermik iluarsaaqqittoqarpoq naammaginarinnngorlugu patajaanninngorlugulu. Ineqarnermut tunngasunik iluarsaaqqittoqarpoq, taamaalilluni inissaminnik pisisinnaasut taamaaliornissamut periarfissaqalissammata akissaqanngitsullu pisariaqartitaminnik ikiorneqartalissammata. Inunnik isumaginninnermut tunngassuteqartuni ikiorsiisarneq sanngiinnerpaanut saatinneqassaaq pensionisiaqarnermullu tunngassuteqartuni qulakkiissavarput inuit pisinnaasut sulerusuttullu suliffeqarnerup avataanut unitsiinnartassannginnatsigit utoqqalinersianut, ineqarnermut inunnillu isumaginninnermut tunngassuteqartunik iluarsaaqqinnitsigut. Tamakkunuuna atugarissaarneq aningaasalersorneqassaaq.

Naalakkersuisut sulinerup piviusunngortinneqarnissaa aallartereerpaat siunissamulli ungasinnerusumut isigaluni sulissutigisassaapput, tassani meeqqatta ernuttattalu inuiaqatigiinnut uagut nammineerluta angajoqqaatsinnit tigusatsinnut pitsaatigisutulli qimannissaannik anguniagaqarnerput puigunngisaannassagatsigu.

Inussiarnersumik inuulluaqqusillunga

Maliina Abelsen